

PPPU NEWSLETTER



Bersinar di Pentas Pantun: UNIMAS Raih Tempat Ketiga FANTASI 2026



Oleh: Siti Aishah binti Azhar

Festival Pantun Antara Asasi (FANTASI) 2026 telah berlangsung dengan penuh meriah di Universiti Putra Malaysia pada 3 hingga 5 April 2026 yang lalu. Program ini telah menghimpunkan 30 kumpulan daripada program asasi dan kolej matrikulasi seluruh Malaysia. PPPU UNIMAS turut menghantar sebuah pasukan yang terdiri daripada empat orang peserta bagi menyertai pertandingan berprestij ini. Pertandingan bermula pada hari pertama dengan sesi pendaftaran dan taklimat peserta, diikuti peringkat saringan pada hari kedua yang dijalankan menggunakan sistem hibrid *round-robin* liga separuh. Pada peringkat saringan tersebut, pasukan UNIMAS berjaya menampilkan persembahan yang konsisten dan meyakinkan sehingga berjaya melayakkan diri ke peringkat suku akhir. Pertandingan diteruskan pada hari ketiga dengan format kalah mati yang melibatkan peringkat suku akhir, separuh akhir dan akhir, sebelum diakhiri dengan majlis penutup. Pasukan UNIMAS berjaya menewaskan pihak lawan pada peringkat suku akhir dan seterusnya mara ke separuh akhir. Walau bagaimanapun, perjuangan mereka terhenti selepas berdepan dengan pasukan yang hebat dalam persaingan yang sengit. Meskipun tidak berjaya mara ke pentas akhir, pasukan UNIMAS tetap mencipta kejayaan yang membanggakan apabila meraih tempat ketiga keseluruhan serta berjaya membawa pulang hadiah wang tunai berjumlah RM 1,500 tajaan Dewan Bahasa dan Pustaka. Pencapaian ini menjadi bukti ketekunan, semangat juang dan kemampuan mahasiswa UNIMAS dalam mengangkat serta memartabatkan seni warisan pantun Melayu di peringkat kebangsaan.

PPPU Perluas Jaringan melalui Sesi Meja Bulat UPTR 2026

Oleh: Dr Ayu Ameliatul Shahilah binti Ahmad Jamri

Sesi Meja Bulat UNIMAS *Pre-University Trans-Borneo Roadshow* (UPTR) 2026 telah dilaksanakan secara dalam talian pada 3 Mac 2026 sebagai usaha mempromosikan program asasi PPPU UNIMAS kepada pelajar, guru dan pihak sekolah di Sarawak dan Sabah. Program ini mendapat sambutan menggalakkan dengan penyertaan 21 buah sekolah menengah dari Sarawak dan Sabah, melibatkan 1,773 pelajar dan 95 guru. Sesi dimulakan dengan kata-kata aluan oleh Pengarah PPPU, Dr Mohd Alhafiiz bin Zailani, serta ucapan perasmian oleh Timbalan Naib Canselor (Akademik dan Antarabangsa), YBhg. Prof Dr Fitri Suraya binti Mohamad Hapni Joblie. Program turut disiarkan secara langsung melalui Facebook rasmi PPPU UNIMAS bagi memperluas capaian kepada khalayak yang lebih besar. Pengisian program merangkumi penerangan program Asasi Sains, Asasi Pengkomputeran dan *International Foundation in Science*, taklimat UPU, sesi soal jawab serta perkongsian pelajar dan alumni. Secara keseluruhan, program ini berjaya mencapai objektif dalam memperkukuh promosi, jaringan sekolah dan keterlihatan PPPU UNIMAS.



PPPU Serlah Kecemerlangan Inovasi di PITRAM 2026

Oleh: Fhriscilla Matin

Sebanyak 17 projek inovasi berjaya dipertandingkan oleh para pelajar dan staf PPPU UNIMAS sempena Pertandingan Inovasi Antara Asasi Malaysia (PITRAM) 2026 yang berlangsung pada 11 hingga 12 April 2026. Program ini dianjurkan oleh Universiti Teknologi MARA (UiTM) Cawangan Selangor, Kampus Dengkil dan dilaksanakan secara hibrid, iaitu secara bersemuka di UiTM Cawangan Selangor, Kampus Puncak Alam serta dalam talian. Daripada keseluruhan penyertaan, 12 projek merupakan hasil inovasi pelajar di bawah Kategori A – Pelajar (Sains dan Teknologi) yang dipertandingkan secara dalam talian. PPPU berjaya meraih lapan pingat perak dan empat pingat gangsa, sekali gus mencerminkan kualiti, kreativiti dan daya inovasi pelajar. Selain itu, lima projek inovasi turut disumbangkan oleh staf akademik dan pentadbiran PPPU di bawah Kategori C – Profesional (Staf Akademik dan Pentadbiran), dengan pencapaian dua pingat perak dan tiga pingat gangsa. Lebih membanggakan, empat orang pensyarah PPPU turut dipilih sebagai juri sepanjang pertandingan, menandakan pengiktirafan terhadap kepakaran warga akademik institusi. Secara keseluruhan, pencapaian PPPU di PITRAM 2026 mencerminkan komitmen berterusan dalam memupuk budaya inovasi dan kecemerlangan, sekali gus mengukuhkan reputasi institusi sebagai pemangkin kepada pembangunan idea kreatif serta berimpak tinggi.

